



Herr Wachtmeister

Herr Wachtmeister, sä se moa, wat se zo mir führt
Ech ha nämlich ganz bestimmt nix bexiert
He ha se min Usweis, Lappe, on Fahrzeuchschein
Wenn se won, bloas ech och e dat Röhrche rin

Ech ha nix geklaut, nemes verschwartet, ken Radau gemacht
Ech sin ob min Leumull allerwäje bedacht
On fahrn ech moa ze schwinn ob dr HTS (1)
Da bezahln ech dat Knöllche on mache ken Stress

Eimoa hat ech ner Politess' bem börse Fenger gewonke
dat hät dä domme Koh gewaltig gestonke
Doa mosst ech nom Rechter, on dä hät mech beloahrt
Nemm lewer zwo Fenger, dat es nie verkoahrt
Zwo Fenger meine jo "Viktoria"
Dat mach ech itz emmer, wenn ich mech obgerät ha

Herr Wachtmeister, ech woar noch net em Kittche
Ech goa och net noa all dä Flittche
E de Bloae Lagune (2) or sost nem Amesierlokal
Doafor wör och min Portmonee veel ze schmal
On min Frau, die schmess mech achtkantech rus
Wenn ech göng e so en verdorwened Hus

On glauwe se mer, lewer Helfer on Freund
Ech rauche sit Joahrn net e moa me en Joint
Fröher ha ech gern gekifft bi zoener Rudde
Ho komme mr ken Gräsjer me e de Dudde.

Herr Wachtmeister, wat genau führt se da zo mir
Mr stoa itz alt fönf Minudde dusse vor dr Dür

Ach, du lewer Zitt, doa ha ech mech wahne verdoa
Säse dat noch e moa, doabet ech et rechtech verstoa

Ech ha bi dr Polezei-Lotterie gewonn
En Fahrt övert Sejerland em Heißluftballong

Hädde se dat doch e moa e bessche fröher gesät
Da drönke mer itz Kaffee on hädde oos net obgerät

(1)
HTS = Hüttentalstraße (Siegener Stadtautobahn)

(2)
"Blaue Lagune" - ein (ehemaliger) "Nightclub" in Geisweid

